

詩曰織女思北止牽牛歎南陽時來嘉慶集整駕中玉箱瓊珮垂藻蕤霧
裾結雲裳釋纜紫微庭解衿碧琳堂歡讌未及究晨暉照扶桑悵悵一宵
促遲遲別日長 宋孝武七夕詩曰白日傾晚照絃月外初光炫炫葉露
滿肅肅庭風揚瞻言媚天漢幽期濟河梁服箱從奔輶統綺闕成章解帶
遽迴軫誰云秋夜長愛聚雙情款念離兩心傷 宋南平王劉鑠七夕詠
牛女詩曰秋動清風扇火移炎氣歇廣簷含夜陰高軒通夕月安步巡芳
林傾望極雲闕組幕縈漢陳龍駕凌霄發沉情未申寫飛光已飄忽來對
眇難期今歡自茲沒 宋謝惠連七夕詠牛女詩曰落日隱簷楹升月照
簾櫳團團滿葉露泚泚振條風蹀足循廣除瞬目矚曾穹雲漢有靈匹彌
年闕相從遐川阻昵愛脩渚曠清容弄杆不次藻聳纒驚前蹤昔離秋已
兩今聚夕無雙傾河易迴幹款顏難久悵沃若靈駕旋寂寥雲幄空留情
顧華寢遙心逐奔龍 宋王僧達七夕月下詩曰遠山斂氛侵廣庭揚月
波氣徃風集隙秋還露泫柯節氣既已屏中宵振綺羅來歡詎終夕收淚
泣分河 宋顏延之為織女贈牽牛詩曰婺女儷經星姮娥棲飛月慙無

二媛靈託身侍天闕閭闔殊未暉咸池豈沐髮漢陰不夕張長河為誰越
雖有促宴期方須涼風發 宋謝靈運七夕詠牛女詩曰火逝首秋節明
經弦月夕月弦光照戶秋首風入隙陵風步曾岑憑雲肆遙脉徙倚西北
庭竦踴東南覲紈綺無報章河漢有駁軌 宋謝莊七夕夜詠牛女應制
詩曰輟機起春暮停箱動秋衿璇居照漢右芝駕肅河陰容裔泛星道透
迤濟烟潯陸離迎宵佩倏燦燦望昏簪俱傾環氣怨共歇浹年心珠殿釭未
沫瑤庭露已深夕清豈淹拂絃輝無人臨 梁武帝七夕詩曰白露月下
圓秋風枝上鮮瑤臺含碧霧羅幕生紫煙妙會非綺節佳期乃京年玉壺
承夜急蘭膏依曉煎昔悲漢難越今傷河易旋怨咽雙念斷悽悼兩情懸
梁簡文帝七夕穿針詩曰憐從帳裏出相見夜窓開針歌疑月暗縷散恨
風來 梁柳惲七夕穿針詩曰代馬秋不歸緇繞無復緒迎寒理夜縫映
月抽纖縷清露下羅衣秋風吹玉柱流景對秋夕餘光欲難駐 梁劉遵
七夕穿針詩曰步月如有意情來不自禁向光抽一縷舉袖弄雙針 梁
劉孝威七夕穿針詩曰縷亂恐風來衫輕羞指現故穿雙眼針時縫合歡